

CONVENIO DE COLABORACIÓN ENTRE A CONSELLERÍA DE ECONOMÍA E INDUSTRIA E O ILUSTRE COLEXIO OFICIAL DE ENXEÑEIRÓS INDUSTRIAIS DE GALICIA PARA O DESENVOLVEMENTO DAS ACTUACIÓNS DE FOMENTO E DIFUSIÓN DA SEGURIDADE INDUSTRIAL EN GALICIA.

Na data da sinatura dixital (25/05/2026)

REÚNENSE

Dunha parte,, en nome e representación da Consellería de Economía e Industria (en adiante CEI), na súa calidade de conselleira, segundo nomeamento recollido no Decreto 44/2024, do 14 de abril, e en virtude das facultades que lle confire o artigo 34 da Lei 1/1983, do 22 de febreiro, de normas reguladoras da Xunta e da súa Presidencia e o Decreto 140/2024 de 20 de maio polo que se establece a estrutura orgánica da Consellería de Economía e Industria (DOG núm. 101 do 27 de maio).

Por outra parte,, en nome e representación do Ilustre Colexio Oficial de Enxeñeiros Industriais de Galicia (en adiante ICOEIG), como decano elixido mediante acordo da Asemblea Xeral Ordinaria do día 2 de decembro de 2023 e coas facultades para a sinatura deste convenio en virtude dos estatutos de dito Colexio.

As partes recoñécense mutua e respectivamente a capacidade suficiente para asinar este convenio de colaboración.

EXPOÑEN

PRIMEIRO.- Que a CEI, a través da Dirección Xeral de Estratexia Industrial e Solo Empresarial como órgano superior, ten atribuídas competencias no ámbito da seguridade industrial, segundo o recollido no Decreto 140/2024, de 20 de maio, polo que se establece a estrutura orgánica da devandita Consellería modificado polo Decreto 101/2025, do 27 de outubro, polo que se modifican o Decreto 142/2016, do 22 de setembro, polo que se modifican as normas reguladoras do Instituto Enerxético de Galicia e se aproban os estatutos da Axencia Instituto Enerxético de Galicia, e o Decreto 140/2024, do 20 de maio, polo que se establece a estrutura orgánica da Consellería de Economía e Industria.

SEGUNDO.- Que o ICOEIG é unha corporación profesional de dereito público, con personalidade xurídica e capacidade xurídica pública e privada para o cumprimento de seus fins, que rexe o seu funcionamento polos Estatutos do propio Colexio, aprobados segundo Decreto 160/2007, de 26 de xullo, modificados polo Decreto 65/2010, de 15 de abril, e polo disposto na Lei estatal 2/1974, de 13 de febreiro de colexios profesionais e Lei 11/2001, de colexios profesionais da Comunidade Autónoma de Galicia.

Entre os seus fins está, como finalidade derradeira, a tutela do correcto exercicio da profesión como garantía dos dereitos dos cidadáns, e promover o desenvolvemento industrial sustentable e a compatibilidade das industrias coa conservación do medio.

Entre as súas funcións están:

- Exercer cantas funcións lle sexan encomendadas polas distintas administracións públicas e asesorar aos organismos do Estado, comunidades autónomas, corporacións locais, persoas ou entidades públicas ou privadas e os seus mesmos colexiados, emitindo informes, elaborando estatísticas, resolvendo consultas ou actuando en arbitraxes técnicas e económicas por instancia das partes.
- Impulsar o desenvolvemento de actividades científicas, técnicas, económicas, sociais e culturais relacionadas coa profesión.
- Fomentar e axudar, polos procedementos que en cada caso entendan máis pertinentes, a aquelas institucións, oficiais ou particulares, que tenten de incrementar o desenvolvemento da industria.

Así mesmo, na exposición de motivos da Lei estatal 2/1974, de 13 de febreiro de colexios profesionais, dise expresamente que "estas institucións deben ser amparadas en canto satisfán esixencias sociais de interese xeral, para que poidan participar eficazmente no perfeccionamento dos fins da comunidade nacional" e no articulado establécese que por enriba dos dereitos e intereses dos seus membros, están chamados a cumprir unha función social.

Ademais, no articulado da Lei estatal 2/1974, de 13 de febreiro de colexios profesionais establécese que os Colexios Profesionais visarán aqueles traballos no ámbito da súa competencia cando sexa necesario por existir unha relación de causalidade directa entre o traballo profesional e a afectación á integridade física e a seguridade das persoas. Entre os proxectos que os Colexios Profesionais se encargan de visar, atópanse aqueles correspondentes ás instalacións incluídas nos diferentes regulamentos de seguridade industrial, e que son proxectadas polas persoas con titulación de enxeñería industrial.

Por outra banda, os Estatutos do ICOEIG recolle no seu artigo 5 que o seu ámbito territorial é o correspondente á Comunidade Autónoma de Galicia, coincidente co ámbito territorial do Programa de fomento e difusión da Seguridade Industrial.

No artigo 6.3 dos devanditos Estatutos dise que o ICOEIG se considera representante da función social da profesión en Galicia. Ademais, as actividades propias deste convenio entran de cheo no ámbito competencial dos enxeñeiros industriais, posto que a formación do enxeñeiro industrial é xeneralista e multidisciplinar, polo que as competencias dos enxeñeiros industriais atópanse en todos os sectores e ámbitos.

TERCEIRO.- Entre os obxectivos fundamentais das actuacións de todas as administracións públicas atópase a procura da seguridade en xeral das persoas, como unha das pezas fundamentais e alicerce sobre o que se sustenta a construción da sociedade do benestar. E neste ámbito cabe salientar, poñer de relevo e visualizar, a propia seguridade industrial (a instalación eléctrica, o ascensor, o vehículo etc.) como parte esencial e intrínseca da cotiandade vital das persoas que conforman as sociedades do cualificado primeiro mundo.

De acordo con este obxectivo, a CEI, en exercicio das competencias que lle corresponden e ten atribuídas en materia de industria, considera de interese social

prioritario e primordial, a promoción e difusión da Seguridade Industrial dos establecementos e instalacións industriais situados na Comunidade Autónoma de Galicia.

Neste senso, a actividade industrial, e a súa calidade e seguridade, teñen un efecto multiplicador que se estende a ámbitos como a investigación ou o desenvolvemento de servizos baseados na tecnoloxía e é, por tanto, garantía de crecemento, creación de emprego de calidade, desenvolvemento da economía, competitividade e prosperidade.

CUARTO.- Que a CEI exerce, a través da Dirección Xeral de Estratexia Industrial e Solo Empresarial, as competencias en materia de industria e seguridade industrial, entre elas a elaboración, programación, seguimento e difusión de estudos e campañas informativas en materia de seguridade industrial.

Que no desenvolvemento das competencias citadas a Consellería desenvolverá unha serie de actuacións extraordinarias dirixidas á mellora de Seguridade Industrial de Galicia, cuxo obxectivo é a prevención e limitación de riscos que a actividade industrial puidese xerar ás persoas, flora, fauna, bens ou ao medio ambiente, así como o establecemento de mecanismos que permitan coñecer en tempo real o cumprimento de requisitos regulamentarios para garantir un seguro, adecuado e correcto funcionamento das instalacións e produtos sometidas á seguridade industrial. Entre estas actuacións, destacan as dirixidas ao fomento e difusión da Seguridade Industrial.

O cumprimento dos regulamentos de seguridade industrial é fundamental para garantir a seguridade das instalacións afectadas e, polo tanto, a seguridade das persoas que as usan. Para acadar un maior grao de cumprimento deses regulamentos, que redunde nun incremento da seguridade das persoas, faise necesario realizar unha campaña de difusión e concienciación da importancia da seguridade industrial entre as empresas e a poboación afectada.

QUINTO.- Que, en liña co desenvolvemento, promoción e coordinación da seguridade industrial, promóvese por parte da CEI, en colaboración con ICOEIG, a posta en marcha dunha serie de actuacións dirixidas a mellorar a seguridade industrial en Galicia.

SEXTO.- Que para a consecución da posta en marcha das anteditas actuacións, as partes consideran de mutuo interese establecer fórmulas de colaboración que permitan executar as distintas accións encamiñadas ao cumprimento dos ditos obxectivos, xa que non se contemplan prestacións propias dos contratos regulados na Lei 9/2017, de 8 de novembro, de contratos do sector público. Entre esas fórmulas de colaboración, considérase máis axeitada a figura do convenio entre unha Administración Pública (CEI) e unha Corporación de Dereito Público (o ICOEIG), ao abeiro do artigo 47.2 letra c) da Lei 40/2015, do 1 de outubro, de réxime xurídico do sector público.

Por todo o exposto, ambas partes acordan subscribir o presente convenio, que se rexerá polas seguintes:

CLÁUSULAS

PRIMEIRA.- OBXECTO

O presente convenio ten como obxecto determinar o marco de colaboración entre a CEI e o ICOEIG para o desenvolvemento conxunto de actuacións de fomento, difusión e concienciación sobre seguridade industrial en Galicia, co obxectivo de sensibilizar sobre a importancia da seguridade industrial, divulgar as obrigas dos titulares de instalacións suxeitas a regulamentos de seguridade industrial para garantir a súa seguridade e promover cantas accións faciliten o cumprimento dos variados ámbitos da regulamentación e disposicións vixentes.

SEGUNDA.- ACTIVIDADES A DESENVOLVER

A CEI e o ICOEIG levarán adiante unha serie de actividades dirixidas ao fomento e difusión da Seguridade Industrial na Comunidade Autónoma de Galicia.

As actividades a desenvolver obxecto deste convenio de colaboración son as seguintes:

1. **Premios de Seguridade Industrial da Comunidade Autónoma de Galicia:** o obxectivo é o de promover no ámbito da Comunidade Autónoma de Galicia o recoñecemento e distinción das entidades, persoas físicas ou xurídicas, que no desenvolvemento da súa actividade destacasen polo seu compromiso na procura da excelencia na seguridade e calidade industrial.
2. **III Congreso de Seguridade industrial da Comunidade Autónoma de Galicia:** a finalidade é a de poñer en valor e no centro de atención a seguridade industrial como valor prioritario da nosa sociedade de benestar.
3. **Revisión e resumos executivos de seis guías didácticas relativas á seguridade industrial.** A finalidade desta actividade é dispoñer de seis guías didácticas en galego e castelán e seis resumos executivos tanto en galego como en castelán que reúnan os requisitos para proceder á súa publicación.
4. **Presentación de guías didácticas para a promoción e difusión da seguridade industrial.** Prevese un acto presentación das seis guías e a entrega aos asistentes dos resumos executivos.

TERCEIRA.- OBRIGAS DO COLEXIO OFICIAL DE ENXEÑEIROIS INDUSTRIAIS DE GALICIA

O ICOEIG colaborará coa CEI no desenvolvemento das actuacións incluídas na cláusula anterior, cuxo detalle se inclúe como Anexo I a este convenio.

Así mesmo, deberá cumprir cos seguintes requisitos ou obrigas:

1. Destinar o importe do financiamento do presente convenio ao obxecto e finalidade que se contén no mesmo.

2. Achegar os informes e documentos que acrediten o desenvolvemento das actividades do presente convenio, así como os informes e demais documentos requiridos pola CEI.
- 3.- Facilitar toda a información que lle sexa requirida pola Intervención Xeral da Comunidade Autónoma, polo Tribunal de Contas ou o Consello de Contas, no exercicio das súas respectivas funcións de fiscalización e control de destino dos fondos transferidos, e facilitar a inspección e control dos órganos da CEI co fin de supervisar o cumprimento das actividades do convenio.
4. Seguir as normas sobre protección de datos, concretamente a Lei Orgánica 3/2018, de 5 de decembro, de Protección de Datos Personais e garantía dos dereitos dixitais e as normas que a desenvolven.
5. Acreditar ante a CEI, con anterioridade a sinatura do presente convenio, que se atopan ao corrente das obrigas tributarias e da seguridade social.
6. Nas diferentes actuacións realizadas por parte do ICOEIG e, nomeadamente, nas accións dirixidas ao fomento, a difusión, a promoción e a concienciación sobre seguridade industrial en Galicia, a entidade fará constar expresamente a colaboración prestada pola CEI, coa utilización do correspondente logotipo identificativo, en virtude do disposto no Manual de Identidade Corporativa da Xunta de Galicia, en todo o material de execución, información e publicidade das actividades do convenio.

CUARTA.- OBRIGAS DA CONSELLERÍA DE ECONOMÍA E INDUSTRIA

1. Colaborar no desenvolvemento daquelas iniciativas e accións vinculadas ao obxecto do convenio para asegurar o seu cumprimento.
2. Financiar as actividades obxecto deste convenio establecidas na cláusula segunda ata un máximo de 82.100,00 €.
3. Supervisar que as actividades sexan desenvolvidas de acordo coas estipulacións do presente convenio e ditar as instrucións que se estimen precisas para a referida colaboración.

QUINTA.- CONTÍA DA ACHEGA ECONÓMICA

A CEI, por medio da Dirección Xeral de Estratexia Industrial e Solo Empresarial, achegará ao ICOEIG, en función do orzamento sinalado, a cantidade de oitenta e dous mil cen euros (82.100,00 €) con cargo a aplicación orzamentaria 09.03.732A.640.8 "Plan de mellora da seguridade industrial de Galicia" da devandita Consellería, ao levar a cabo as actuacións obxecto do convenio:

Código proxecto	Aplicación orzamentaria	Importe ano 2026
2024 00036	09.03.732A.640.8	82.100,00 €

Esta achega económica realizarase como unha compensación dos gastos nos que incorra o ICOEIG para a axeitada execución das accións obxecto do convenio. En ningún caso se aboarán importes que supoñan a obtención de lucro por parte do dito Colexio.

A distribución do orzamento desagregada en función das actuacións previstas no Anexo I é a seguinte:

PARTIDAS	IMPORTE (€)
Premios de Seguridade Industrial da Comunidade Autónoma de Galicia	15.600,00
III Congreso de Seguridade industrial da Comunidade Autónoma de Galicia	33.300,00
Revisión e resumos executivos de seis guías didácticas relativas á seguridade industrial	24.000,00
Presentación de guías didácticas para a promoción e difusión da seguridade industrial	9.200,00
TOTAL	82.100,00

Calquera modificación substancial das actuacións previstas no Anexo I do presente convenio deberá ser solicitada á CEI, quen decidirá sobre a súa procedencia e, no caso de aceptarse, se levará a cabo a súa formalización mediante a correspondente "addenda".

Sen prexuízo do anterior, e sen necesidade de instar á modificación do convenio a través dunha "addenda", poderanse aceptar variacións nas partidas de gasto indicadas anteriormente, coa limitación do 25 % de cada unha delas, sempre que non aumente o importe total do convenio, e que non se desvirtúen as súas características e obxectivos.

SEXTA.- GASTOS ATENDIBLES

Con carácter xeral, considéranse gastos atendibles aos efectos do convenio aqueles que, de xeito indubidable, responden á natureza das actividades e fins do convenio.

Os gastos deberán ser realizados, facturados e efectivamente pagados dentro do ámbito temporal do propio convenio e, polo tanto, no que atinxe unicamente a actuacións realizadas desde a sinatura deste convenio e a data de xustificación, de conformidade cos prazos sinalados nesta cláusula. Exceptúanse aqueles gastos cuxos pagamentos deban efectuarse nun momento posterior por axustárense aos calendarios de recadación, como os ingresos á conta do IRPF ou as cotas dos seguros sociais.

O importe do IVE (imposto do valor engadido) non se considerará gasto xustificable cando sexa susceptible de recuperación ou compensación, salvo que se acredite a exención do mesmo e consecuentemente non resulte recuperable.

Todos os gastos externos iguais ou superiores aos 3.000 euros, IVE excluído, deben ser notificados á CEI antes da súa contratación.

Os gastos nos que incorra o ICOEIG serán compatibles con outras cantidades públicas ou privadas que puidese recibir, que deberán ser declaradas nas liquidacións do convenio e diminuírán o importe total a chegar pola CEI.

Todos os gastos externos xustificados polo ICOEIG deben axustarse a prezos de mercado, polo que podería solicitarse unha auditoría sobre os gastos xustificadas, no caso de que non exista outro patrón de público coñecemento que permita establecer o dito axuste.

Entre outros conceptos, consideraranse atendibles ao abeiro deste convenio os gastos propios ou os derivados de contratacións para a subministración ou servizos de empresas e profesionais independentes nos seguintes ámbitos:

- a) **Gastos de persoal** propio do ICOEIG, excepto as indemnizacións por despedimento e xubilacións anticipadas.

Os custos atendibles de persoal minoraranse na contía das deducións e bonificacións de cotizacións á Seguridade Social de que goce a entidade por razón da contratación do persoal cuxo custo se impute á subvención, prorrateada, de ser o caso.

- b) **Materiais:** adquisición de materiais, compoñentes precisos, subministracións e produtos similares para a realización das actuacións deste convenio.
- c) **Publicidade e comunicación:** gastos de inxerir publicidade relacionada coa sensibilización na seguridade industrial nos distintos medios de comunicación existentes, tanto físicos como dixitais, incluídas as redes sociais.
- d) **Materiais promocionais:** gastos de creación, emisión, difusión e envío de carteis, folletos ou similares, relacionados coa sensibilización na seguridade industrial.
- e) **Materiais audiovisuais:** gastos de creación, emisión e difusión de vídeos relacionados coa sensibilización na seguridade industrial.
- f) **Xornadas informativas de divulgación e promoción:** gastos de organización e execución de xornadas informativas sobre a seguridade industrial, incluíndo o arrendamento de salas e equipos, catering, gastos de poñentes, persoal de apoio, etc.
- g) **Contidos web:** gastos de creación de contidos web relacionados coa sensibilización na seguridade industrial.
- h) **Imaxe corporativa:** gastos de creación dunha imaxe corporativa relacionada coa sensibilización na seguridade industrial.

Considéranse gastos atendibles os comprendidos entre a data da sinatura do convenio e o 30 de novembro de 2026.

SÉTIMA.- VIXENCIA

Este convenio entrara en vigor ao día seguinte da súa sinatura e estenderá a súa vixencia ata o 31 de decembro de 2026.

OITAVA.- PAGAMENTO

A CEI achegará para o financiamento do custo das accións previstas no presente convenio un importe total máximo de oitenta e dous mil cen euros (82.100,00 €). Esta cantidade será aboada con cargo aos orzamentos da Xunta de Galicia para o ano 2026, nos que existe crédito axeitado e suficiente para financiar ata o 100% esta achega, conforme á partida orzamentaria 09.03.732A.640.8 "Plan de mellora da seguridade industrial de Galicia"

NOVENA.- PRAZO E FORMA DE XUSTIFICACIÓN

A data limite para a presentación da correspondente xustificación da realización das actividades do presente convenio será o 5 de decembro de 2026. Admitiranse os xustificantes de gastos realizados dende a data da sinatura do convenio ata o 30 de novembro de 2026.

Para a acreditación á que se refire o parágrafo anterior, o ICOEIG presentará á Dirección Xeral de Estratexia Industrial e Solo Empresarial, unha vez finalizados os traballos que se detallan na cláusula segunda deste Convenio, a seguinte documentación:

- a) **Certificación** do órgano que teña atribuídas as facultades de control da **toma de razón en contabilidade do cumprimento da finalidade do convenio e da aplicación dos fondos destinados para tal efecto**. Ademais, incluírase unha declaración responsable de que non existe ánimo de lucro e que os importes reclamados se circunscriben á satisfacción dos gastos nos que teña incorrido para a execución das actividades obxecto deste convenio. Esta declaración responsable deberá estar asinada dixitalmente pola persoa que ostente a representación legal da entidade.
- b) Unha **Memoria de Actuación xustificativa do cumprimento das actividades obxecto do convenio**. Presentarase un informe final detallado con indicación do grao de cumprimento respecto ao planificado, os resultados obtidos e as incidencias máis significativas no marco deste convenio. Nos casos en que sexa posible, empregaranse indicadores obxectivos para medir o impacto logrado a través de cada acción. Nos casos daquelas actividades nas que se elabore documentación, materiais gráficos, de promoción, audiovisuais, ou calquera outro material en formatos analóxicos ou dixitais que se obteña no desenvolvemento das actividades deste convenio, achegarase copia dun exemplar ou a ligazón a webs e outros espazos virtuais relevantes nos que poida acreditarse a súa existencia.
- c) **A/s factura/s polo importe segundo se sinala na cláusula quinta co detalle das actuacións efectuadas e programadas na cláusula segunda acompañada dunha Memoria Económica xustificativa do custo das actividades realizadas que conterà:**
 1. Unha relación dos gastos e investimentos clasificados por partida orzamentaria, con identificación do acredor e do documento, o seu importe, data de emisión e data de pago e partida orzamentaria á que corresponde. Esta táboa virá asinada e selada polo responsable da entidade.

2. Orixinais ou fotocopias compulsadas dos documentos acreditativos do investimento ou actuación consistentes en facturas dos provedores ou documentos de valor probatorio equivalente.

As facturas e xustificantes de gasto deberán reunir os seguintes requisitos, de acordo co establecido no Real Decreto 1619/2012 relativo ás obrigacións de facturación:

- Deberá poder identificarse de forma clara o número da factura e a súa data de emisión.
- Deberá identificarse correctamente tanto o destinatario dos bens ou servizos como o obrigado a expedir a factura, incluíndo as súas correspondentes razóns ou denominacións sociais, números de identificación fiscal e domicilio.
- O concepto da factura deberá ser claro e relacionado coas actividades atendidas neste Convenio, describindo as operacións e a data de realización das mesmas.
- No caso das subcontratacións o documento xustificativo ou factura deberá facer referencia á actividade ou tarefas subcontratadas no marco do proxecto en cuestión.
- Deberá poderse identificar o tipo impositivo ou tipos impositivos aplicados ás operacións.
- Finalmente, deberá poderse identificar a cota tributaria repercutida, que deberá consignarse por separado, no seu caso.

En calquera caso, o importe xustificado de cada factura será o valor total da mesma sen IVE. Para poder incluír o IVE como gasto financiable, o ICOEIG deberá presentar o correspondente certificado de estar exento do pago do IVE.

Se as facturas están en idioma distinto do galego ou español, deberase achegar tradución da descrición do servizo, subministración ou outro tipo de gasto que corresponda, debéndose axustar as facturas aos requisitos que esixa a lexislación de cada país estranxeiro.

3. Orixinal ou copia compulsada da documentación bancaria dos pagamentos. Presentarase adxunto a cada documento de gasto o seu correspondente documento de pagamento e o extracto bancario onde figure o cargo correspondente.

Non se admiten os pagamentos en efectivo.

Os xustificantes bancarios de pagamento deben coincidir exactamente co importe da factura, IVE incluído. No caso de que o importe reflectido no documento bancario non coincida co importe do documento de gasto (pagamento agrupado), deberase remitir unha relación dos pagamentos efectuados xunto cos documentos de gasto, onde se poida identificar o gasto en cuestión.

- d) **Copia compulsada do último recibo do IAE**, cando o ICOEIG deba estar dado de alta no imposto de actividades económicas. No caso de que o ICOEIG fose suxeito pasivo do IAE pero estivese exento do pago deste tributo, aportará declaración

responsable na que se fagan constar tales circunstancias. Por último, cando o ICOEIG non estea suxeito á citada obriga tributaria aportará declaración responsable na que figure que non está suxeito a dito imposto.

- e) **Certificado relativo á situación do ICOEIG con respecto ao imposto sobre o valor engadido (IVE).**
- f) **Certificados acreditativos de estar ao corrente nas obrigas tributarias e coa Seguridade Social e de non ter pendente ningunha débeda, por ningún concepto, coa Administración pública da Comunidade Autónoma.**
- g) **Declaración da titularidade da conta bancaria onde se debe realizar o pagamento.**

O ICOEIG responsabilizarase da veracidade dos documentos presentados.

En todo caso, a CEI resérvase o dereito de solicitar toda a documentación que considere precisa, en relación coa xustificación do cumprimento do obxecto do convenio e calquera outra que estime oportuna para a correcta xustificación do gasto e o seu pagamento.

O ICOEIG manterá a disposición da CEI ou de calquera organismo público con capacidade de fiscalización da Comunidade Autónoma de Galicia, tales como a Intervención Xeral, o Tribunal de Contas e o Consello de Contas, todos os xustificantes dos gastos e ingresos obtidos a fin dunha verificación *in situ*, ben por medios propios ou mediante auditor externo. O prazo para a comprobación material de facturas e xustificantes de gasto será de 5 anos desde a finalización do prazo de vixencia do convenio.

DÉCIMA.- CONTROL

A CEI poderá levar a cabo as actividades de inspección que considere oportunas para controlar o cumprimento da actividade.

DÉCIMO PRIMEIRA.- PUBLICIDADE DA SUBSCRICIÓN DO CONVENIO

De conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006 de 20 de xullo, polo que se regula o Rexistro de Convenios da Xunta de Galicia, a CEI publicará no Diario Oficial de Galicia, no Portal de transparencia e Goberno Aberto e na súa páxina web oficial o importe da prestación económica concedida ao abeiro deste convenio e a entidade destinataria desta, e incluírá igualmente a referida contribución e as sancións que como consecuencia deste puidesen impoñerse nos correspondentes rexistros públicos, polo que a sinatura do convenio leva implícita a autorización para o tratamento necesario dos datos da entidade e a referida publicidade, así como a súa cesión aos órganos competentes da CEI.

O ICOEIG deberá subministrar toda a información necesaria para que a CEI poida dar cumprimento ás obrigas previstas no Título I da Lei 1/2016, do 18 de xaneiro, de transparencia e bo goberno. As consecuencias do incumprimento desta obriga serán as establecidas no artigo 4.4 da citada lei.

DÉCIMO SEGUNDA.- PROPIEDAD INTELECTUAL

A documentación xerada como consecuencia da execución deste convenio será propiedade conxunta do ICOEIG e a CEI. Na medida en que a mesma sexa susceptible de protección mediante o réxime da propiedade intelectual, seralles de aplicación o disposto no artigo 7 do Texto refundido da propiedade intelectual, relativo á obra en colaboración.

A titularidade de todos os dereitos de propiedade intelectual inherentes á documentación elaborada será do ICOEIG e da CEI, por ámbito mundial e polo prazo de protección dos dereitos de propiedade intelectual, de acordo coa normativa nacional e comunitaria aplicable.

DÉCIMO TERCEIRA.- COMISIÓN DE SEGUIMIENTO

Para garantir a correcta execución e seguimento do pactado neste Convenio, constituirase unha Comisión de Seguimento integrada por dúas persoas representantes de cada parte asinante. Esta Comisión actuará como órgano de vixilancia, seguimento e control do establecido neste convenio. Así mesmo, esta comisión supervisará a programación das accións concretas ás que se refire o convenio e avaliará e controlará as actividades realizadas.

A comisión reunirse en sesión constitutiva nun prazo non superior a un mes desde a sinatura deste convenio. Así mesmo, reunirse tantas veces como o soliciten as partes para analizar o grao de cumprimento dos obxectivos fixados, propor a resolución dos conflitos específicos que puidesen exporse e realizar calquera outra actuación de coordinación que se estime precisa.

O presidente da Comisión, que será un dos representantes da CEI, terá voto dirimente.

Son funcións da Comisión de Seguimento as seguintes:

1. Realizar a vixilancia, o seguimento e control das actuacións do Convenio.
2. Propor solucións aos conflitos que puideran xurdir na aplicación e interpretación das cláusulas do convenio.
3. As que sexan precisas para garantir a correcta execución do convenio.

A Comisión reunirse as veces que sexan precisas á solicitude de calquera das partes asinantes.

Esta Comisión rexerese en canto a súa constitución, funcionamento e adopción de acordos pola normativa vixente en materia de órganos colexiados regulada na sección 3ª do capítulo primeiro do Título I da Lei 16/2010, do 17 de decembro, de organización e funcionamento da Administración Xeral e do sector público autonómico de Galicia.

DÉCIMO CUARTA.- CONFIDENCIALIDADE

O ICOEIG comprométese a manter a confidencialidade de toda a información facilitada que teña dito carácter.

Cando o ICOEIG desexe utilizar algún dato que teña carácter de confidencial para a súa publicación ou difusión, deberá solicitar a autorización da CEI.

DÉCIMO QUINTA.- RELACIÓN CONTRACTUAL

A subscrición do presente convenio non leva consigo relación laboral, contractual ou de calquera outro tipo entre os profesionais que vaian desenvolver as actividades a desenvolver no presente convenio e a Xunta de Galicia, de maneira que non se lle poderá esixir responsabilidade algunha, nin directa nin subsidiaria, polos actos ou feitos acaecidos no desenvolvemento do mesmo.

DÉCIMO SEXTA.- RESOLUCIÓN

O convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución do presente convenio as seguintes:

- a) O transcurso do prazo de vixencia do convenio.
- b) O acordo unánime de todos os asinantes.
- c) O incumprimento das obrigas e compromisos asumidos por parte dalgún dos asinantes. Neste caso, calquera das partes poderá notificar á parte incumpridora un requirimento para que cumpra nun prazo de 10 días hábiles coas obrigas ou compromisos que se consideren incumpridos. Este requirimento será comunicado á Comisión de Seguimento do convenio e ás demais partes asinantes. Se transcorrido o prazo indicado no requirimento persistira o incumprimento, a parte que o dirixiu notificará ás partes asinantes a concorrencia da causa de resolución e entenderase resolto o convenio.
- d) Por decisión xudicial declaratoria da nulidade do convenio.
- e) Introducción de modificacións substanciais cando a Comisión de Seguimento non acorde a proposta dunha modificación do Convenio.
- f) Por calquera outra causa distinta das anteriores prevista no convenio ou noutras leis.

Se cando concorra calquera das causas de resolución do convenio existen actuacións en curso de execución, as partes, a proposta da Comisión de Seguimento do convenio, acordarán a continuación e finalización das actuacións en curso que consideren oportunas, establecendo un prazo improrrogable para a súa finalización, transcorrido o cal deberá realizarse a liquidación das mesmas.

DÉCIMO SÉTIMA.- MODIFICACIÓN

Calquera modificación substancial das actuacións previstas no Anexo I do presente convenio deberá ser solicitada á CEI, quen decidirá sobre a súa procedencia e, no caso de aceptarse, se levará a cabo á súa formalización mediante a correspondente "addenda".

DÉCIMO OITAVA.- AUTORIZACIÓNS

O ICOEIG consente expresamente a inclusión dos datos relevantes e persoais deste convenio nos rexistros públicos que proceda, de acordo co Decreto 126/2006, do 20 de xullo, así como poderá exercer os seus dereitos de acceso, rectificación, cancelación e

oposición respecto do contido dos rexistros antes citados ante a CEI, con sede no complexo administrativo de San Caetano s/n, 15704, Santiago de Compostela.

Este consentimento esténdese á autorización para a cesión dos seus datos á entidade financeira na que se aboe o pagamento, ao Diario Oficial de Galicia e ás demais cesións previstas na lei.

Tamén comporta a autorización á CEI para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda e Administración Pública da Xunta de Galicia.

DÉCIMO NOVENA.- NATUREZA E RESOLUCIÓN DE CONFLICTOS

O presente convenio ten carácter administrativo quedando fóra do ámbito de aplicación da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE, do 26 de febreiro de 2014, de conformidade co seu artigo 6, sen prexuízo da aplicación dos principios desa lei para resolver as dúbidas e lagoas que puidesen presentarse, consonte o previsto no seu artigo 4.

As partes comprométese a resolver de común acordo, ante a Comisión de seguimento, calquera controversia que puidese suscitarse sobre a interpretación ou execución deste convenio. En caso de conflito, as partes acordan o sometemento á Xurisdición Contencioso-Administrativa.

VIXÉSIMA.- SUPLETORIEDADE

Para todo o non previsto neste convenio aplicarase o previsto na Lei 16/2010, de 17 de decembro, de organización e funcionamento da Administración Xeral e do sector público autonómico de Galicia, a Lei 40/2015, do 1 de outubro, de réxime xurídico do sector público, así como na Resolución do 8 de abril de 1991 (DOG nº 82, do 30 de abril) pola que se fai público o acordo do Consello da Xunta de Galicia, do 27 de marzo de 1991, sobre convenios de cooperación con outros entes públicos e de colaboración con particulares, na Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o Rexistro de Convenios da Xunta de Galicia, en todo o que non se opoña á Lei 1/2016, do 18 de xaneiro.

Tendo lido o presente convenio e, en proba de conformidade, asíñase por todas as partes no lugar e data ao principio indicados.

Pola Consellería de Economía e Industria

Polo Ilustre Colexio Oficial de Enxeñeiros
Industriais de Galicia

ANEXO I ACTUACIÓNS QUE SE DESENVOLVERÁN NO MARCO DESTE CONVENIO

- Organización dos Premios de Seguridade Industrial da Comunidade Autónoma de Galicia:

Teñen o obxectivo de promover no ámbito da Comunidade Autónoma de Galicia o recoñecemento e distinción das entidades, persoas físicas ou xurídicas, que no desenvolvemento da súa actividade destacasen polo seu compromiso na procura da excelencia na seguridade e calidade industrial, así como a difusión e implantación de boas prácticas nestes ámbitos.

Os premios de Seguridade industrial estarán integrados nunha sección da VI edición dos premios Galicia de Industria (Gala de Premios Galicia Industria y Energía) organizada polo Ilustre Colexio Oficial de Enxeñeiros Industriais de Galicia.

Concederanse premios nas seguintes categorías:

- Iniciativa innovadora en seguridade e calidade industrial.
- Traxectoria profesional ou cívica, relevante para o fomento da seguridade e a calidade.

Ademais haberá un apartado especial e unha imaxe específica para a Seguridade Industrial xa que se se entregarán dous premios de Seguridade Industrial.

- III Congreso de Seguridade industrial da Comunidade Autónoma de Galicia:

Enfocado como un gran evento, tanto presencial como online, no que se reunirá durante 2 días a todos os axentes relacionados co sistema da seguridade industrial de Galicia: empresas, profesionais, administracións públicas, organizacións empresariais e sindicais, institucións educativas e outros sectores vinculados coa seguridade industrial.

Este congreso estará centrado na seguridade industrial en locais de pública concorrencia e espectáculos públicos.

Contarase coa presenza de asociacións de instaladores, organismos de control e responsables destes sectores.

- Revisión e resumos executivos de seis guías didácticas relativas á seguridade industrial:

Redacción dos Resumos executivos de seis guías técnicas elaboradas no marco dos convenios asinados nos anos 2024 e 2025:

- GUÍA GENERAL SEGURIDAD INDUSTRIAL
- GUÍA INSPECCIÓN Y MANTENIMIENTO EN INSTALACIONES DE LA ADMINISTRACIÓN
- GUÍA SEGURIDAD INDUSTRIAL EN EL ÁMBITO DOMÉSTICO

- GUÍA SEGURIDAD INDUSTRIAL EN ASCENSORES
- GUÍA SEGURIDAD INDUSTRIAL EN GASOLINERAS DESATENDIDAS
- GUÍA SEGURIDAD INDUSTRIAL PROTECCIÓN CONTRA INCENDIOS

Revisión lingüística por un tradutor oficial de todos os textos o que incluírá a revisión ortográfica e gramatical, revisión de linguaxe non sexista e corrección de estilo.

As guías técnicas e os resumos executivos adaptaranse ao Manual de Identidade Corporativa da Xunta de Galicia, (<https://www.xunta.gal/identidade-corporativa/descarga-do-manual>) incluíndo a marca Xacobeo 2027.

Maquetación dos Resumos executivos en galego e castelán seguindo a liña gráfica prefixada desde a Secretaría Xeral de Industria e Desenvolvemento Enerxético.

O obxectivo principal desta actividade é dispoñer de seis guías didácticas en galego e castelán, seis resumos executivos tanto en galego como en castelán que reúnan os requisitos necesarios para realizar o seu depósito legal, obter o número internacional para a catalogación de libros (ISBN), tendo en conta a propiedade conxunta do ICOEIG e a CEI, así como proceder á súa publicación

- Presentación de guías didácticas para a promoción e difusión da seguridade industrial:

O ICOEIG conxuntamente coas asociacións e empresas relacionadas dos correspondentes sectores realizará a presentación das seis guías técnicas que se relacionan no punto anterior coa finalidade de darlle difusión tanto no propio acto como a través das asociacións e entidades que traballen para poñer en valor a seguridade industrial.

Ademais para este acto imprimíranse exemplares dos resumos executivos para entregar fisicamente aos asistentes ao mesmo.